

SEGUNDA CARTA DEL APÓSTOL SAN JUAN

La verdad y el amor

¹Nugö, dúr hermano Juan, desde ya má yabbu xtú eme cam Tzi Jmuju Jesucristo, cja dí pehtzi cam cargo gá anciano, dí jampi ur huenda yu hermano. Dí penqui nar carta-ná, nuque, hermana, göhtjo co quir bajtzi. Car Tzi Ta jitzí xí juaquijü, cja xcú hñemeju car Jesucristo hneje. Nuquigüe, dí mahqui, göhtjo co quir bajtzi, como hnaadi car palabra ca dí teniju. Cja jin gui jønguitsjegüigö dí mahquijü, sino guejti cü pé ddáa cü xí nden car palabra ca ncjuani, guejti-cú i mahquijü, hneje. ²Dí göhtjoje, dí mahquijü, como ya xtú emeju car palabra ca ncjuani, göhtjo mbo um tzi mayju. Jin da mpun car palabra-cá, cja jin da mbödi. Dí emeju-cá, cja da segue da tteme göhtjo ur tiempo.

³Cam Tzi Tajü pu jitzí, cja co hñeh car Jesucristo, cár Tzi Ttu, da möxquijü pa gui hmupju rá zö, da nuquijü co cár tzi ttijqui, cja da jñujtiqui ir mayju. Da möxquijü ca guír teniju car palabra ca i man ca ncjuani, cja co ca guír madiju quir minga-hermanoju.

⁴Nugö, xtú ndo mpöjö ca xtá ntjeje cü dder bajtzi cü i ten nar palabra nu ncjuani. Guegue-cá i eme cja i bbupju ncja ngu ga bbejpiguiju cam Tzi Tajü pu jitzí. ⁵Nuya, hermana, dí nzohqui, dí mbembiqui tzü, gu majtsjeju, dí göhtjoju. Jin gur ddadyo mandamiento nu dí xihquijü. Gue nar mandamiento nu xí tsijquijü desde bbü ndú fadi ndú emeju. ⁶I nesta gu øjtibiju cü mandamiento cü xí xijquijü ca Ocja pa gu majteju ncja ngu ga ne guegue. Bbü cja ngu hñemeju nar palabra ca Ocja, gü dyødeju car mandamiento ca bi zoguiju cam Tzi Jmuju Jesús. Guegue-cá bi ma, dí göhtjoju gu maj yum hñohuiju.

Los engañadores

⁷Nuquigüeju, hermano, ya xná ngu jiojte i dyo hua jar mundo, i xih cü pé dda cjahni, i ndo ntjumuy car palabra ca ba ja guegue-cá, nu car palabra ca dí teniju, jin gui ntjumuy. Cja pé i man-cá, car Jesús ca dí emeju, múr hñøjtjo. Jí xcuí hñe jitzí, cja jí mí gue car Cristo, como jí xcuí mejni car Tzi Ta jitzí. Ncjaru ga man cü jiojte-cá. ⁸Nuquigüeju, gui jñaju ur huenda

pa jin da jiöhquijü cü cjahni-cá. Gui segue gui hñemejú car palabra ca xí tsijhquijü, pa da hmüy completo quer tñajajú pü jítzi bbü xta ttzojnquijü cja xta ttahquijü ca xcrú tajmü hua jar jöy.

⁹I bbüh cü dda cjahni cü ya jin gui eme car palabra ca xí tsijjquijü digue car Jesucristo. I tzandijü-cá. Guegue-cá ba ja hñahño ü car palabra, cja i majmü, nucá i ndo ntjumüy-cá. Pe jin gui yojmü ca Ocja cü cjahni-cá, cja jí rí hñeh ca Ocja car palabra ca ba jajü. Car cjahni ca i emetjo car palabra ca i ntjumüy digue car Jesucristo, guegue-cá i yojmi car Tzi Ta jítzi cja co hñeh cár Ttü ca Ocja. ¹⁰Eso, dí xihquijü, bbü da zöti pü jabü gár bbüpjü hnar cjahni ca di cön car Jesucristo,

di ma, jí úr Ttü ca Ocja, nuquejú, jin gui recibijü car cjahni-cá pü jabü guí jmuntzijü. Jin gui cuajtijü ncjahmü dur hermano, nim pa gui zengujá gá hermano. ¹¹Porque bbü gui xijmü ü hermano car cjahni-cá, ncjahmü guí ne gui föxjú cár bbeñi, hní, ü ntjötitjo car palabra ca ba ja.

Palabras finales

¹²Nugö, pé dí mbengö pé dda palabra rá ngu dí ne gu xihquijü, pe ya jin gu juxcua. Como ya xtí ne gu ma pü jabü gár bbüpjü, xcrí ntjejú pü, xcrí ñájü bbü. Nubbú, xtá ndo mpöjmü, bbú, dí göhtjojú.

¹³I penquijü nzengua quí bajtzi quer cjujue. Guejti guegue-cá úr bajtzi ca Ocja ca xí juajni.

I ttzedi hua nar carta-ná.